

## **Esteitmentu konjunta ba Loron Mundiál Ai-han, loron 16 Outubru 2021 Husi HASATIL no Koligasaun Agrikultura**

### **Promove sistema ai-han lokál ne'ebé nutritivu, reziliente no inkluzivu hodi atinje Soberania Ai-han**

Iha eventu komemorasaun **Loron Mundiál Ai-han** tinan 2021, HASATIL ho Koligasaun agrikultura hakarak louva ba agrikultór sira hotu iha Timor laran tomak ne'ebé kontinua servisu maka'as hodi halo produsaun ai-han ba Timor-oan sira hotu nia konsumu, maski enfrenta dezafiu no problema oin-oin, liu-liu durante periodu COVID-19. Ami mós hakarak fó hanoin fali ba ita nia Governu, Parlamentu Nasionál, Prezidente Repúblika no ba Públiku tomak atu tau nafatin atensaun ba situasaun real iha ita nia rai liga ba ita nia sistema ai-han.

Ita nia situasaun produsaun ai-han sei nafatin laiha progresu boot maski governu no doador sira gasta ona osan tokon ba tokon ba setór ne'e. Ita kontinua iha número inseguransa ai-han no malnutrisaun ne'ebé boot no afeta ba labarik sira ho idade menus tinan lima mai kraik mós laiha mudansa boot, bazeia ba dados malnutrisaun króniku 47% (Stunting) no 8,7% Wasting<sup>1</sup>, malnutrisaun ida ne'e mós akontese kauza husi toman han ne'ebé la saudavel hahú kedan husi labarik iha inan nia knotak.

Ita nia sistema ai-han mós la reziliente ba ameasa husi risku global sira hanesan mudansa klimátika no pandemia sira. Ho COVID-19 ita aprende ona katak bainhira mundu monu ba krize nia laran, ema hotu nia preokupasaun primeiru mak ai-han. Iha Timor-Leste ita hasoru ameasa boot liu tanba ita depende maka'as tebes ba importaun ai-han husi rai li'ur, hanesan dependénsia ba foos importaun husi Vietnam no nasaun sira seluk. Mudansa klimátika mós halo ita nia produsaun rai laran la estavel tanba udan tun la tuir ona nia tempu ho variabilidade ne'ebé aas, impaktu seluk mak estraga mós infra-estrutura báziku sira ne'ebé fasilita agrikultór sira nia produsaun no movimentu ka asesibilidade ba merkadu.

Alein de ne'e, dados governu nian mós hatudu katak problema kiak no in-seguransa ai-han, malnutrisaun no dezigualdade sosiál sei aas liu iha area rural sira ne'ebé maioria povu moris hanesan agrikultór. Ida ne'e tanba ita nia polítika iha setór agrikultura no mós setór seluk ne'ebé liga ba sistema ai han, hanesan setór infra-estrutura, komérsiu no sosiál, la promove partisipasaun iguál ema hotu no la inkluzivu, liu-liu ema ho defisiénsia, feto, LGBT, no mós foin-sa'e sira.

Bazeia ba observaun sira iha leten ne'e, HASATIL ho Koligasaun Agrikultura hakarak fó hanoin ba ukun na'in sira hotu atu:

1. Investe barak liu hodi promove agrikultura familiar ne'ebé eziste nanis ona iha ita nia rain, programa agrikultura familiar nudár meius sira atu prodús di'ak liu no barak liu tan. Agrikultura família bazeia ba rekursu lokál sira, hanesan matenek lokál, fini lokál, no pratika agrikultura ne'ebé di'ak ba ekolojia no haforsa ekonomia família. Governu tenke proteje família agrikultór sira atu sira la bele monu ba lasu kompañia boot sira,

---

<sup>1</sup> Ministériu Saude Timor-Leste food and Nutrition survey final report 2020

liu husi sistema sira ne'ebé halo agrikultór sira tenke depende ba fini íbrida, adubus kímiku no pestisida kímiku sira.

2. Dezenvolve infra-estrutura iha nivel Suku to'o Aldeia sira hodi haforsa comunidade sira nia reziliénsia ba mudansa klimátika, liu husi harii irrigasaun eskalaun ki'ik ne'ebé fornese bee ba uma kain sira nia toos iha tempu ne'ebé laiha udan, suporta konservasaun ba bee, ai-laran no bee matan sira atu labele maran. Hadi'ak estrada no ponte sira to nivel aldeia atu comunidade iha asesu nafatin ba merkadu.
3. Utilizasaun teknolojia apropriadu durante tempu kolleita hodi hasa'e produsaun no produtividade.
4. Haforsa no hametin konsumu ai-han lokál hodi estimula produsaun ai-han iha rai laran no hadi'ak rendimentu família.
5. Promove sistema ai-han ne'ebé inkluzivu, hodi fasilita partisipasaun hanesan ba ema ho defisiénsia, feto sira, LGBT, no mós foin sa'e sira, iha atividade sira ne'ebé liga ba sistema ai han, inklui produsaun, distribuisaun, merkadoria, prosesamentu no mós laboratóriu hodi teste produktu ai-han sira iha rai laran.
6. Ikus liu, ami hakarak hato'o ami nia solidariedade no apoiu ba movimentu kamponezes no família agrikultór hotu iha nivel nasional no mundiál ne'ebé kontinua luta hodi halakon poder kompañia boot sira nian iha setór agrikultura. Tenke fó fali poder produsaun no sistema ai-han ba kamponezes no agrikultór ki'ik sira ne'ebé mak sai forsa loloos ba mundu nia sistema ai-han ida ne'ebé saudavel, sustentável, ekitavel, no di'ak ba meu ambiente.

Kmanek wa'in ba ita hotu!

Viva agrikultura Timor-Leste, Viva Soberania Ai-han!

Dili, 19 Outubru 2021

Asina husi:

- HASATIL
- La'o Hamutuk
- PERMATIL
- Oxfam iha Timor-Leste
- KSI
- RHTO
- ADTL
- APFTL
- Juventude Agrikultór Munisipiu